

ABO:

E scandal real di e siman aki:

No ta incidente dilanti cas di gobernador, pero e abuso institucional riba pensionadonan

Siman a habri y kico tabata e noticia principal, e incidente entre e prome minister y algun miembro di grupo di 7. Segun e noticianan, aki tabata trata di intimidacion, agresion y abuso.

Aspectonan cu ta condenabel den tur sociedad y bou di tur circunstancia. E incidente aki y e reaccionnan cu a bini despues, ta tipifica y haci hopi visibel e division entre e pueblo. Un division cu ta tumando lugha pa hopi añanan caba, pero cu lo tin un solo perdedor: e pueblo! Manera e temanan aki a bira e noticia principal di e siman, e ta bon pa nos papia riba nan pero den un contexto mas amplio y evidente. Ban papia riba e abuso cu ta wordo comete contra e pensionadonan.

Pa casualidad of no, pero net dialuna tambe tabata e dia mundial di conscientisacion riba e abuso y maltrato riba hende grandi. E ta conoci cu hende grandi ta sufi den silencio y poco biah nan ta expresa nan mes cu nan tambe a bira victima di abuso y maltrato. Hopi persona ta pensa cu ta hende so por abusa y maltrata otro. No, tambe institucionnan por abusa y maltrata hende. E forma scondi con e implementacion di e impuesto solidario (Cft, 4 juni 2015) a bay y e declaracion di e minister di financia den parlamento cu si mester bin mas medida pa e aña aki, e lo no pensa ni dos biah pa bin cu nan, tambe por wordo considera como un abuso y maltrato institucional. Nos tur sa cu e

Tabel. Desaroyo demografico (CBS: Quaterly Demographic Bulletin, 3rd Quarter 2014)

Class	Index (2010=100)
20-24 aña.	19.53
25-29 aña .	8.95
30-34 aña .	3.15
35-39 aña .	-4.30
40-44 aña .	-0.17
45-49 aña .	-6.11
50-54 aña .	11.48
55-59 aña .	17.29
60-64 aña .	25.30
65-69 aña .	25.36
70-74 aña .	11.48
75-79 aña .	21.78
80-84 aña .	34.25
85-89 aña	33.01

situacion socioeconomico ta dificil y cu algo mester wordo haci, pero tuma medida sin pensa riba e efectonan riba e sociedad, lo causa mas daño cu nan lo haci bon.

E tabel adhunto ta muestra claramente cu e pensionadonan a crece hopi mas cu tur otro clase durante e ultimo añanan y por lo tanto e grupo aki lo sigui crece. E grupo aki tambe ta representa

un grupo cu no ta participa mas den e proceso laboral, cu consecuencia cu un parti grandi di nan tin un entrada hopi abou. Awendia e mercado laboral no ta produciendo suficiente trabou pa esunnan cu ta biba riba e isla y cu por/ kier traha. Tambe hopi dunado di trabou ta prefera di duna un hende mas hoben of un hende di un otro pais e trabou. Y pa termina e pensionado no por competi cu e asunto di 'cheap labor' of nan ta 'over qualified'. Den e caso mes cu un pensionado haya un trabou, e impuestonan cu gobierno ta aplica riba e entrada adicional, lo percura cu e pensionado lo no progresa mucho. Pues e storia cu ta wordo bendi na e pensionadonan cu nan situacion financiero lo drecha si nan sigui traha, ta un fabula.

E no ta un secreto publico cu e grupo aki ta sufriendo. Pero e ta bira mas dramático ora bo tende cu casi 12% di nan entrada chikito ta bay pa paga e prima di AZV, manera AZV ta un seguro obligatorio. Si un pensionado ta haya AWG. 1000 pa luna, casi AWG. 120 ta bay pa AZV. E ora e ta resta AWG. 880 pa paga ELMAR, WEB, SETAR, cumpira cuminda y tambe biba di dje.

Cu e implementacion silencioso di e impuesto solidario, unda a wordo anuncia cu gobierno lo uza e BAZV y e BBO pa reduci e deficit financiero, el a bira hopi obvio kendenan ta e victimanan real di e malgastamento di placa. E BAZV por yega te 5% of mas, mientras e BBO por



yega te 8% of mas cu e introduccion di un sistema nobo di impuesto. Incluyendo esakinan den e prima di 12%, anto e grupo aki por termina pagando casi 25% of mas di nan entrada na impuesto y prima. Pa no lubida e constante aumento di e costo di bida. E aumento di pensioen y algun regalonan mas cu e pensionadonan a haya, no a yuda nan cu nada. E mesun regalonan, awor ta wordo kita via e impuesto solidario y kisas mas lo wordo kita. Tambe e regalonan a pone un peso adicional riba e debe nacional. Un tactica uza mundialmente pa politiconan pa laga e pueblo kere cu nan tambe a haya algo, pero nada en comparacion cu locual e politico a haya: pues, sushamento di vovow di pueblo. Pregunta ta si ainda e pensionadonan mester ta contento y agradecido pa e regalonan ricibi awor cu a resulta cu nan lo bay mas atras den nan entrada? E ta bon tambe pa remarca cu ningun aumento di un beneficio social, ta danki na un politico. Cu e aumento no a pasa pa hopi aña, ta mas un berguensa y un otro prueba cu e politiconan a haci pueblo mas pedido di limosna y dependiente di nan.

Nos di partido ABO lo percura pa caba cu e asunto di haci pueblo dependiente y pedido di limosna di un politico. E ta e deber di e po-

litico pa traha pa pueblo y no abusa di dje. Tambe nos lo stimula pa mas pensionado sigui traha, si e kier y por sin cu gobierno ta demotiva nan cu impuestonan halto riba e entrada extra. Elimina tur obstaculonan cu ta haci imposibel cu momento un persona yega 45 aña, ya e ta bieu y e no por haya un trabou bon paga, cu no ta den gobierno.

E degradacion y discriminacion di persona mester caba. Riba e isla aki nos no mester margina hende of crea mas clase di hende cu no ta conta. Pasobra na final, ta un sociedad no saludabel ta wordo crea y ta nos tur tin cu paga pa esaki. Percura pa e pensionado nunca por paga mas prima cu un persona cu ta traha. Caba cu e fenomeno di 'cheap labor' cu a desbalansa henter e mercado laboral. Tambe cera e fronteranan temporal, pero limita, te ora cu tin suficiente trabou pa esunnan cu ta biba akinan y cu ta contribuyendo na e fondonan social. Nos no por importa mas problema social y demografico.

Pues ainda tin hende cu ta cuestiona kico ta e scandal di abuso di siman? Dicon nos no ta mira algun politico lanta brabo tambe y bisa 'BASTA. Te aki e abuso riba esunnan mas vulnerabel den nos sociedad ta caba'?

ABO ta ARUBA y ARUBA ta ABO!
(www.aboaruba.org, aboaruba@hotmail.com) □

BON DIA *Aruba*

Pa AVISO den nos Corant

aviso@bondia.com